

ratou tikiti. I roto i tena 600 e 200 nga Maori. Ahakoa kua kati te whakaputa tikiti, kei te haere tonu mai nga tono mo etahi tikiti, ara a te iwi Maori.

Kua tae te tono ki a Te Hikihana kia whakaaetia mai kia toru nga ra. Kaati, ma koutou e titiro i nga pepa pakeha te whakaaetanga, te korenga ranei.

Kia kaha te manaaki i tenei Mihana whakamutunga a Te Hikihana. Ko matou ko nga mea kua kite, e mohio ana, he mahi whakamiharo he mahi na te Atua.

ETAHI WHAKAORANGA.

KANUI nga turoro Maori kua ora i o ratou mate. Haunga hoki te pakeha kei te rangona nga manaakitanga mo ratou.

I Heretaunga nei etahi merckara.

- (1) He wahine tera, ko tona mate he pakarutanga toto. Ka wha marama e takoto ana, me te mahia e te takuta. I te taumaha o tona mate kaore i taea te mau ki te Whare-karakia. I tae mae a Te Hikihana ki tona whare. Ka mutu te inoi a Te Hikihana, ka mutu hoki tona mate. Kua maranga inaianei, a kua pai rawa atu.
- (2) He kuia tera kua pararaiha te taha mau katoa, ringa-ringa me te waewae. He mea mau atu i runga i nga tuuru hurihuri ki te Whare-karakia. Te mutunga o te karakia ka maranga ki runga. Inaianei kei te haere ia i runga i ona waewae ake mo te maero, rua maero atu i te ra.
- (3) He tangata tera i tapahia e te takuta i a Pepuere ka huri nei. Kaore rawa te tapahanga ra e hono. No te Mihana kua hono.
- (4) He tangata tera no Taupo i tae mai ki te Mihana. Ko te mate he turi. I muri iho i te Mihana ka tae mai ki a au, whakaatu mai ai kua rongo ana taringa. Katahi ano ka rongo i te haruru o te motoka, ka rongo hoki i toku reo.
- (5) He kotiro no Ngati Porou, kua roa e mate ana, kua tata ki te 2 tau. Takoto ai i te Hoihipera i Turanga. He kahi pea i te iwi o te waewae, a nawai ra, ka poto taua waewae i tetahi o nga waewae. No te Mihana i Turanga i haere atu i runga i nga turupou. Te putanga mai ki waho, haere atu ana, kaore he turupou. Kei te ora kei te haere ki te karakia.
- (6) He tamaiti tane tera. Ko te mate kei tetahi o nga waewae, i kainga ko te iwi o te waewae. Ko tana waewae he maaro tonu, kaore e rite te hikoi ki te mea ora, toro maaro tonu ai ki te hikoi. No te Mihana ki Turanga, e ki ana ia, i te wa i pa ai nga ringa o Te Hikihana me te Atirikona, ka rongo ia ki tetahi mea matao e heke iho ana i tona upoko ki roto i tona tinana. No tona putanga mai ki waho haere ai, ka kite nga tangata kua haere tika